

2019 Schnitzelpunk

Dr Jaden isch im Unihock, dr Finn im BTV.
Im Summer händs kai Training, aber seckla müand si au.
Sie müand fürz Churerfäscht, dia Bändla go vertschutta.
Zum Glück händs das ir Schual scho güabt, mir Pro Juventutta.

Dia Bauschtell Sinergia, dr neu Beamtasilo,
hettma, wämmas hüt aluagt, würekli könnä si loh!
As Huus mit gnuag Matratzana, wod schlofa kasch ganz locker,
hättends könnä übernäh vom Möbelhändler Stocker.

Körperkult isch sexy, drum machend miar au mit.
Für a geile Body haltend miar üs fit.
Nur das kooga Baika isch aifach nid erotisch,
wenn uf am Sattel d'Eier schlofend und dr Pimmel tot isch!

Amur senza fin, do langschi diar jo an Grind,
gseht ma sogar in Hollywood, nid nur im Trin-Mulin.
Dr Emser Pfarrer hät kai Freud und tuat sich sehr dra stossa,
dass d Frauä in däm Film nid nur Kerza tüan usblossa.

I verträga kai Gluten.
Und i törf kai Laktosa.
Und miar gohts nach Fructosa und Glucosa grad ind Hosa.
Miar blähts bi Sorbitin.
Miar bi Histamin no feschter.
Hey, ii kann frässa, was i will.
Läck, bisch du vo geschter.

Dr Vitus Huonder isch ganz spitz, das isch im Fall kai Witz,
uf ds Buabainstitut in Wangs als neua Altersitz.
Är hofft, dia junga Schöfli gäbend ihm dänn neua Schwung.
Miar wünschend ihm fürs Rentanalter viel Befriedigung.

A huufa glatti Vorstöss hämmiar dank diar erläbt.
Als letschta no a Pflichtversichrig, falls mol d Erda bebt.
Nur bbebet häts dänn bi da Wahla nur für di allai.
Jetzt hinterlosch a grossi Luca – Tenchio and goodbye.

Dr Amisabi vo Scharans häts üs wella bewiisa.
Da Schlauis und da Klauis d Regiarigswahl vermiisa.
Nur händ dia Doppelhaasa sich am Schluss is Füüschtli glacht.
Und är kann jetzt dia ganzi Nacht, luaga was dr Mond so macht.

Dr Uali Murer schpiiks am WEF inglischi veriwell,
au mit da allergröschta Tschütttsch verstoht är sich ganz schnell.
Är hät kai Luscht uf Ethik und Moral und dära Shit.
Är tänkt do ganz olympisch: Hauptsach ma macht mit!

Kai Rägatropf dr Summer dur, nur Sunna, sona Fruscht!
Kai Höhafüür, kai Frauafürz, kai Wurscht am 1. Auguscht.
Funkaflüüg und Selbstentzündig haltet ma in Schach.
Doch ohni Spiass am Churerfescht isch trotzdem Füür im Dach.
Dank Vorsicht und Verbot verläuft dia Summerhitz ganz glatt.
Und kuum häts richtig gschneiet, brennt dia halbi Stadt.
As brennt bir Poscht, as brennt bir Ems, dänn brennts no im Konvikt.
Was brennend intressiart, isch do ächt d SVP verstrickt?
Fürs Züüsli und für Flächabränd isch dia jo wohlbekannt.
Do a Brändli, döt a Rauch, allpott dä huara Brand.

Lut Gian-Franco Kasper gits kai Klimawandel meh.
Drum stächend miar uf Krüzfahrt mit Somedia in See.
Miar machend üs kai Gwüssa vo wäga Umweltgführli.
Für d Umwelt wüchlich gführli sind nur Plastikrührli!

As wandlet nid nur z Klima, nai s wandlend sich au d Wärt.
D Frau vo hüt isch selbstbewusst, nümma nu am Herd.
Hät sie früaner Schnulza gluagt und är drnäbed pennt,
macht dr Maa hüt Pittipätti fürnas Happy-End.

Make Love statt CO2, sägend d Klimaaktivista.
Dr Gieri machts, goht mit dr Frau sofort ab in d Kischta.
Är hät dänn ds Klima glich belaschtet, wenn au nur ganz kurz.
Loht dä Kärli wos ihm kunnt... Ach lömmers isch jo schnurz.

Arosa Tourismus macht a Tiarversuach.
Schön fiin tarnt als Bäraland mit viel Tourista z Bsuaach.
Das Experiment zeigt zerschte Mol uf Ärda,
dass zwei Albaner und a Serb au könnd Fründe wärda.

Ohni Doppeladler, nur mit ächte Eidgenossa,
wär üsi Nati dopplet Scheisse, regelrächt verschossa!
Ohni -itsch und -olo machen Länderspiel kai Spass.
Waisch wia vielmol gits a Goal wägma Doppelpass?

Im Priaschterseminar gits jetzt a neuu Fakultät.
für dr Umgang mit dr aigna Sexualität.
As git a Professur zum schwuli Goofa therapiara
und Pfaffa lärnend züchtig und fromm ejakulira.

Bisch als Rumantsch gebora, häsches wüchlich nätt.
Muasch nur a bizli jömmmerla, damit ma Mitlaid hät.
Dänn gits as Extrawürschtl, muasch di nid mol gross bewega,
übersetzt in alli Idiom für dini paar Kollega.

Är isch an gaila Siach, hockt nid ufs Muul.
Kätscht sina Keutsch so huara cool.
Är isch, wianer isch und haut ufa Tisch.
Sait, wenna si muas, was zsäga isch:
Don't say, don't say "Fuck you"!
Don't say, don't say "Fuck you"!
As hät ihm aber dänn dr Boga gä,
dr HCD am Arsch vor Tabälla zgseh.
Hät gsait, är hegis gseh und das tuat huara weh,
got doch dä Glünggi zum ZSC
Don't say, don't say "Fuck you"!
Don't say, don't say "Fuck you"!